



Ove je godine u Gazi Husrev-begovoj medresi u Sarajevu svoje redovno srednjoškolsko obrazovanje završila 450. generacija učenika ove škole. Ovaj za Gazi Husrev-begovu medresu, Islamsku zajednicu, Bošnjake i Bosnu i Hercegovinu značajni jubilej obilježen je nizom svećanih vjerskih i kulturnih manifestacija u Sarajevu i u Bosni i Hercegovini. Gazi Husrev-begova medresa u Sarajevu jedina je škola u Bosni i Hercegovini koja kontinuirano radi i djeluje više od četrina i pedeset godina. Bilo je i još uvijek ima među Bošnjacima mnogo onih koji nisu znali, odnosno ne znaju, tu činjenicu. Narodi sa mnogo dužom poviješću obrazovnih institucija bili bi ponosni na vjersko-prosvjetnu, obrazovnu i kulturnu tradiciju i misiju kakvu je imala i ima Gazi Husrev-begova medresa u Sarajevu. Teško je procijeniti značaj ove škole u vjerskoj, prosvjetnoj, naučnoj, kulturnoj i političkoj povijesti Bošnjaka i Bosne i Hercegovine. Hiljade imama, predvodnika džemata diljem Bosne i Hercegovine, hiljade muallima, vjeroučitelja, hiljade prosvjetnih, naučnih i kulturnih djelatnika, stotine najznačajnijih bošnjačkih i bosanskohercegovačkih alima, znanstvenika, pisaca i društvenih djelatnika izašlo je kroz nepunih pet stoljeća iz ove škole.

Gazi Husrev-begova medresa u Sarajevu mnogo je više od jedne srednjoškolske obrazovne institucije. To upečatljivo može pokazati pismo koje je Počasnom odboru za obilježavanje jubileja "450 generacija Gazi Husrev-begove medrese u Sarajevu" iz Beča uputio dr. Smail Balić, jedan od svršenika ove škole, politički disident iz vremena komunističke Jugoslavije, autor *Kulture Bošnjaka*, i više drugih značajnih knjiga i radova na bosanskom, njemačkom, arapskom i engleskom jeziku s područja islamskih nauka, orijentalistike, književne i kulturne historije Bošnjaka i Bosne i Hercegovine, prominentni zagovornik međureligijskog dijaloga na mnogim evropskim i svjetskim naučnim skupovima, konferencijama i međureligijskim susretima, dobitnik Ordena I klase Predsjednika austrijske države za zasluge na području nauke i umjetnosti. Dr. Balić, u nemogućnosti da prisustvuje sjednici Počasnog odbora za obilježavanje jubileja

"450 generacija Gazi Husrev-begove medrese u Sarajevu", kojom je predsjedavao Reisu-l-ulema Islamske zajednice u BiH dr. Mustafa Cerić, kao jedan od svršenika ove škole u svom pismu upućenom Reisu-l-ulemi piše:

"Veoma poštovani i dragi Reisu-l-ulema Mustafa-efendija!

Na današnjem kratkoročnom pozivu na skup u Gazi Husrev-begovoj medresi na 19. ovoga mjeseca povodom izlaska 450. naraštaja maturanata srdačno zahvaljujem. Rado bih se odazvao da nisam vezan za druge termine. To bi bila prilika da obnovim sjećanja na dragu školu koja me je snadbijela s temeljnom obukom za život i da se nađem u društvu suputnika i istomišljenika. Ali, eto, moram tu priliku propustiti.

Zahvalan sam velikom Gaziji što mi je svojim hajratom omogućio da se probijem kroz život pa i svojim skromnim radom postignem zadovoljštinu koja opravdava uvjerenje da se nisam bezrazložno rodio. Poput mnogih drugih Gazinovaca imam sreću da služim kao znak da Gazi Husrev-beg živi među nama, jer on po Pejgamberovoj znanjoj riječi doprinosi, što izravno, što neizravno, životu. Zato sam uspomeni velikog Vakifa posvetio dvije knjige: svoju disertaciju i djelo *Ruf vom Minarett* ("Zov s munare")."

Završimo ovo kratko podsjećanje na veliki jubilej Gazi Husrev-begove medrese u Sarajevu riječima koje je Reisu-l-ulema dr. Mustafa Cerić uputio članovima Počasnog odbora za obilježavanje jubileja "450 generacija Gazi Husrev-begove medrese u Sarajevu", svršenicima ove škole: "Biti alumnus - svršenik Gazi Husrev-begove medrese jest osobna čast i kolektivni prestiž, ali je istodobno i osobna obaveza i javni teret koji nije uvijek lahko nositi. Osobna je čast biti gazinovac zato što nema babe koji nije poželio da mu sin završi Medresu i kolektivni prestiž je zato što nema gazinovca koji nije osjetio ljubav i poštovanje od muslimana. Osobna obaveza svakog gazinovca je da zna da Gazi Husrev-begova medresa nije obična škola koja daje diplomu za vazifu, nego da je to škola koja mu određuje uzvišenu misiju kako u privatnom tako i u javnom životu."

m

Dževad HODŽIĆ